

Newspaper	BERITA HARIAN
Date	07 DECEMBER 2016

Kehadiran Tun M di pentas DAP bukti hipokrasi

BH-7/12/2016

Kuala Lumpur: Kehadiran Tun Dr Mahathir Mohamad di Persidangan Kebangsaan DAP, Ahad lalu ditafsirkan sebagai komitmen politik yang penuh hipokrasi.

Ahli Majlis Tertinggi (MT) UMNO, Datuk Seri Dr Irmohizam Ibrahim, berkata kehadiran bekas Perdana Menteri itu didasari rasa khuatir pengaruh Parti Pribumi Bersatu Malaysia (PPBM) akan tergugat.

Katanya, walaupun tidak diundang ke persidangan itu, Dr Mahathir menganggap ia satu peluang untuk mengukuhkan kepercayaan DAP bagi menzahirkan keinginannya menjatuhkan kerajaan.

“Tohmahan yang dilemparkan terhadap MCA hanya untuk mengambil hati perwakilan persidangan. Kesanggupan Tun Mahathir bersekongkol dengan pembangkang hanya untuk meraih sokongan sehingga memuji ucapan Lim Guan Eng (Setiausaha Agung DAP) kononnya mematuhi Perlembagaan sedangkan mereka sering mencabar undang-undang negara.

Maruah diperlekeh

“Lim Kit Siang (Penasihat DAP) pula secara tidak langsung berjaya merendahkan maruah dan imej Tun Mahathir yang pernah me-

nerajui UMNO dan menjadi Perdana Menteri, di hadapan penyokong DAP,” katanya dalam satu kenyataan, semalam.

Ahli Parlimen Kuala Selangor itu turut mendakwa, kecaman Dr Mahathir terhadap Presiden UMNO, Datuk Seri Najib Razak dan seluruh kepimpinan serta perwakilan UMNO yang menghadiri Perhimpunan Agung UMNO 2016 juga tidak berasas.

“Apa yang diperkatakan beliau tidak boleh diterima kerana selama ini banyak kebaikan dibuat UMNO. Biar apa pun kecaman yang diterima, pucuk pimpinan

UMNO tidak akan sesekali berganjak dari terus melakukan kebaikan,” katanya.

GERAKAN persoal sikap DAP

Sementara itu, GERAKAN mempersoal sikap DAP terhadap Dr Mahathir yang menganggap bekas Perdana Menteri itu tidak pernah menggunakan isu perkauman selama 22 tahun memerintah negara.

Setiausaha Agung GERAKAN, Liang Teck Meng, berkata perubahan sikap dan pendirian selama 22 tahun DAP terhadap Dr Mahathir secara mendadak ini menggam-

barkan seolah-olah parti itu dilanda ‘skandal’ atau berlaku salah urus di dalamnya.

“Jika DAP boleh menukar pendirian mereka secara tiba-tiba terhadap sejarah 22 tahun lalu, mengapa rakyat Malaysia perlu percaya kepada apa yang DAP katakan ketika ini atau pada masa depan.

“Sama ada DAP tidak mempunyai prinsip dan mempunyai tulang belakang seperti obor-bor atau mereka menyesatkan rakyat Malaysia selama 22 tahun. DAP perlu memohon maaf kepada seluruh rakyat Malaysia,” katanya.